

**Date – 11/03/2025**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Mizoram Legislative Assembly session neih mek chuan zu khapna dan siamthatna tur, “The Mizoram Liquor (Prohibition) Amendment Bill, 2025” chu eptu te tel lova pass a ni.**
- 2. UD& PA Minister Pu K.Sapdanga'n hlawhtlin tuma bei tak tak te pui turin sorkar department te an inpeih reng a ti.**
- 3. Parliament Budget session thawh hnihna tan ni nimin khan Rajya Sabha MP Pu K.Vanlalvenan NIT Mizoram harsatna tawh chung chang a sawi.**
- 4. Prime Minister Narendra Modia chuan ni hnih cham turin nizan khan Mauritius a pan.**

<><><>

**MLP ACT AMENDMENT PASSED**

**Mizoram Legislative Assembly session nimin khan zu khapna dan siamthatna tur, “The Mizoram Liquor (Prohibition) Amendment Bill, 2025” chu eptu te tel lova pass a ni.**

**Bill puluttu, Excise and Narcotics Minister Pu Lalnghinglova Hmar chuan he bill hi zu phalrai na tur a ni lo tih sawiin, sum siamna tur lian tham pawh a awm lova, vote zawinna tur a ni lo bawk tih House a hrilh a, he bill hi kuthnathawktute lam tang bill a ni a, zu khap burna a ngheh lehzualna tur a ni tih a sawi a ni.**

**He bill chungchang hian sawi a hlawh hle a, member 23 in house chhungah an sawi a, Speaker Pu Lalbiakzama chuan he bill he house chhunga chai hlawh ber pawl a ni tih a sawi a ni.**

**Eptu hruaitu Pu Lalchhandama Ralte chuan, zu khap bur an duh laia zu zawrhna tur bilh luhna bill chu an pass pui thei lo tih a sawi a, house an chhuahsan a ni.**

**BJP MLA Dr K Beichhua chuan dan thar zeh luhah Excise and Narcotics in special permission nei ho chung a zu a zuar tur chu an pawm thei lo a tih a sawi a ni.**

**House Leader Pu Lalduhoma chuan member ten house an chhuahsan chu pawl a tih thu sawiin, bill ungrual taka pass theih an duh a, eptu lamin an duhlo a nih pawhin ‘duhlo’ an ti mai turah a ngai a ti a, he bil hi zu zawrh phalna ah ngaihsak luiin puh lui tlat mahse Zoram mipui ten an pawmpui theih a beisei a ni, a ti.**

Excise Minister Pu Lalngthinglova Hmar chuan tuna MLP Act hman mek chuan Autonomous district 3- Mara , Lai leh Chakma Autonomous District Council te a huam lova, tuna an bill putlul hi chuan Mizoram pum a huam tawh dawn tih sawiin, Autonomous district 3-ah te pawh hian sap zu leh rakzu te chu khap vek a ni dawn tih a sawi a, hemi chungchangah member te atanga a duhlo an awm avangin Autonomous District Council a hman ve tumna erawh ennawn theih a ni ang a ti.

<><><>

#### WINE

Excise and Narcotics Minister Pu Lalngthinglova Hmar chuan The Mizoram Liquor (Prohibition) Amendment Bill, 2025 chu kuthnathawktute'n an hlawkpui dawn avangin Agriculture leh Horticulture department te tana malsawmna an nih theihna tur bill-ah an ngai tih a sawi.

Nimin sessionah Excise Minister chuan dan hman mekah chuan tun dinhmunah Champhai leh Hnahlna grape atanga wine siam chauh phal a ni rih a, balhla, lakhuihthei leh dragon fruit bakah thei dang atanga wine siamchhuahte chu dan bawhchhiatna a ni vek tih sawiin, Mizorama kuthnathawktu thei dang chingtute pawh an hmangaih ve vek avangin an thei tharchhuah hmangin wine siam ve se an duhsak avangin he bill hi an pulut tih a sawi a, Excise and Narcotics Department atang ngei pawhin dan hman lai siamthat tul tihna awm bawh avangin dan thar an duang tih a sawi.

Hemi chungchangah hian Kohhran hruaitute an rawn hnuah Zu pui leh Zu tuitling an duh loh avangin tun thla March ni 1 khan an dan thar duan atangin an paih leh ta a, an bill putlul chu kuthnathawktute tharchhuah thei leh thlai hmanga wine siam phalna chauh a nih thu sawiin MNF sorkar hunlaia wine, alcohol 10 percent siam an phalsak bak chu he danah hian telh an tum lo tih a sawi a, he dan thar an duanah hian ram pawn atanga beer laklul phal a ni lova, local fruit beer siam chauh an phal dawn tih a sawi bawh a ni.

Eptu hruaitu Pu Lalchhandama Ralte chuan he bill hi tlanche pahin House-ah tum hnih putlul a nih thu a sawi a, a bul tan tirhah chuan zu chi hrang hrang zuar turin an ruahman a, he bill hi a putruk tak avangin kohhran hruaitute chuan Chief Minister leh Excise Minister te an kawm hnuah a bill chu hmanhmawh takin an siamtha leh hnuhnawh niin a sawi a, ZPM kaihhruai sorkar chuan kohhran leh NGO te thurawn an ngaipawimawh lo hle a hriat thu a sawi a. ADC huamchhunga awm ten Sixth Schedule zalenna an neih te an pawngsual sak chu pawh a tih thu a sawi a, hei bakah hian Excise Minister chu he bill hian khawtlangah nghawng a neih dan tur te an zirchiang em tih te, mihring hriselna a nghawng theih dan tur te an ngaihtuah tel em tih zawhna te a zawt a, he bill-ah hian zu zawrh leh thlah zalen duhna lian tak a awm ni-a a lan thu sawiin, ZPM kaihhruai sorkar chu kohhran te kawra hmangah puhin, zu zawrh chak, a taka zuar ngam si loah a puh bawh a ni.

<><><>

#### SELF HELP GROUP

UD& PA Minister Pu K.Sapdanga'n hlawhtlin tuma bei tak tak te pui turin sorkar department te an inpeih reng a, ZPM kaihhruai sorkar pawhin flagship programme, Bana Kaih a duang tih a sawi.

UD& PA Minister chuan nimin khan Aijal Club Park-ah UD&PA Department buatsaih, Sanjha Utsav (Self Help Group Mela) a hawng a, Home Minister chuan mi harsa zawkte tan, Self Help Group chu bultanna dik a ni tih a sawi a, hlawhtlin tuma bei tak tak te pui turin sorkar chuan flagship programme, Bana Kaih a duang a, sorkar department te pawh heng mite tanpui tur hian an inpeih reng tih a sawi a, nikuma Self Help Group Mela an neih kha a hlawhtling hle tih sawiin, khami tuma thil siamchhuah zuar chhuaktute zingah ram chung leh ram pawnah hralhna tur te an hmu a, an eizawna kawngah hlawk lehzualna an nei chu lawmawm a tih thu a sawi a ni.

Hei bakah hian Home Minister chuan UD&PA Department chuan environment leh faina humhalh kawngah pawh hma a la nasa hle tih sawiin, mipuite chu plastic um hman loh emaw hman tlem emaw inzirtir turin a chah a, Mizorama khawlai leh tui lakna lui tibawlhhlawhtu ber chu polythene a nih avangin polythene bag aiah ip dang hmang turin mipuite a chah bawk a ni. Self Help Group Mela an hawnaah hian Self Help Group hrang hrangin an thil siam phochhuahna, stall 20 chuang an hawng a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MP

Parliament Budget session thawh hnihna tan ni nimin khan Mizoram Rajya Sabha MP Pu K.Vanlalvena chuan NIT Mizoram in hun rei tak atanga harsatna a tawh chung chang a sawi a.

MP Pu K.Vanlalvena chuan Mizoram NIT chu India sawrkarin kum 2009 a NIT a din thar 10 zinga pakhat a nih thu te, a tirah chuan VNIT Nagpur atanga bul tan a nih thu te leh July 2011 ah Mizorama sawn luh a nih thu te a sawi chhuak a. Din tirh a nih atanga tun thlengin mahni puala building la nei lovin hmun hrang hrang Durtlang, Chaltlang leh Tanhrilah te mimal building luah a la ngaih thu a sawi bawk.

NIT Mizoram chuan building sa tura an inbuatsaih tan laiin NIT ram Lengpui chu Riverine Reserved Forest chung ami a ni tiin Forest Dept atangin Complaint a luh thu leh NIT chu sum tam tham tak chawi tura Forest in an phut avanga harsatna tawk an nih thu a sawi chhuak bawk a ni.

He harsatna sutkian sak tura Union Minister of Forest and Climate Change Pu Bhupendra Yadav a hnena a ngenna te tihhlawhtlin a nih avanga lawm thu sawiin, NIT Mizoram in Forest Dept hnena pawisa chawi tur zat chu nasa taka tih hniam ni tawh mahse Mizoram sum harsatna hriat saka a bo a bang awm lova nuai bo sak turin Rajya Sabha MP chuan Sawrkar laipui a ngen a ni.



## PM

Prime Minister Narendra Modia chuan ni hnih cham turin nizan khan Mauritius a pan. A cham chungin Prime Minister Modia hian Mauritius National Day-ah khuallian niin a hmanpui ang. Kum 1968-a British awpna hnuai atanga an zalenna ni March ni 12 hi kumtin Mauritius Natioal Day atan hman thin a ni.

PM Modia chuan a zinchhuah dawna thuchhuah a siamah Mauritius thliarkar chu thenawm ram pawimawh tak anih thu sawiin Indian Ocean-a India thawhpui tangkai tak a ni tih a sawi a. Africa khawmualpui tlawhpawhna chhuahka pawimawh tak anih thu a sawi bawk a ni.



## LADING BILL

Tuifinriat lama sumdawna tilian turin Lok Sabha chuan Bills of Lading Bill,2024 a pass. he bill hian dan awmsa Indian Bills of Lading Act,1856 a thlak dawn a. Sumdawng lawnglian ten bungraw phurh kualna kawnga phalna an lak thin dan siam danglam a ni.Sawihonaah Union Minister for Ports,Shipping and Waterways Sarbananda Sonowal chuan ramchhunga tuifinriat lam sumdawna tihchangtlun zel chu a pawimawh tih sawiin tuna dan thar pass tak chu dan pawimawh tak anih thu a sawi a. Ram awptu hmasa mingoten dan an lo siam hnawl a, dan thar siam a ni chuan ram nihna dik tak a pholang a ti bawk.

